



Hi Abang Abaka, An Saging Nga Naiiba

Hadton una nga panahon, an mga puno, katamsihan, kamanampan ngan isda ha dagat namagyayakan. Sugad man liwat an ngatanan nga may-ada kinabuhi.

Usa kaadlaw , may tumubo nga saha ha piliw han usa nga puno han saging. Gintawag ito nga Abang Abaka. Maharasahas ngan napuputos hiya hin maitom ngan madakmol nga mga dahon. Nalalain hiya han iba pa nga mga saha an napapansin han iroy nga puno han saging. Pero waray niya ito asiha kay pare-pareho la an iya pagkita han iya mga saha.

Pero iba an pagkita han mga saha. Deri nira makarawat an hitsura ngan an kaitom han kolor han ira bugto. "Iwas dinhi!" guliat han usa. "Deri ka sugad ha amon; maraot ka ngan maluya!" guliat liwat han usa.

Salit nagpahirayo hi Abang Abaka ha ira ngan nabuhi nga nag-usahan pero mas naging marig-on.

Naluoy an Iroy nga Puno han Saging ha iya anak. Ngan pirit nga gin-aabot an iya mga dahon para makaiwas ha paso han adlaw. Pero an iba nga saha dayon nga naaawa. Sanglit ginpanginano han Iroy nga Puno han Saging an iya bug-os nga atensyon ha ira.



Usa ka adlaw umabot an usa nga makusog nga bagyo. Bumaha ha tanuman ngan gin-abot an pamilya ni Abang Abaka. Nagkagisi-gisi an mga dahon han Iroy nga Puno han Saging ngan nagka utud-utod an iya mga dahon. Gin-aanod an iya mga anak han malaksi nga darusdos han tubig ha salug. Waray hiya nahimo ngan napaluhod nala hiya samtang ginkikinitaan nala niya an mga anak nga saha nga gin-aanod. Pero malaksi nga gumios hi Abang Abaka. Dayon niya ginhubo an iya maitom nga panit, iya ini gindurudugtong dugtong ngan gin-itsa niya hin makusog.

“Mga kabugtuan saluha niyo ini nga akon panit ngan kapot kamo hin maupay. Tatalwason “ko kamo!” Ginbutong ni Abang Abaka an iya mga kabugtuan hasta nabari an iya bata pa nga lawas. Pero nakuha pa gihapon niya ini ngan nahigawas ha ligid. Pagkatapos nakaluhod ngan tigda natumba hi Abang Abaka.

“Habaka! Habaka!” guliat han kabugtuan nga nag-aabot-abot an pagginhawa. Gin-alsa nira hi Abang Abaka.

“Pasaylu-a kami manoy. Ha imo pala maitom nga panit may gintatago ka ngayan nga maupay nga kasing-kasing. Salamat han pagsalbar mo ha amon!” napahiya hiya han iya nabatian, pagpasabot nga iya ginkakarawat.

Tikang hadto magsarapit ngan magurupod na hira pagtubo hin magkusog ngan magrig-on.

